



Sesida dals

13 d'avust 2024

Communitgà ils

15 d'avust 2024

Protocol nr.

644/2024

Incumbensa Mazzetta

concernent zonas da protecziun per in paregliament controllà da l'avieul da mel

Resposta da la Regenza

Actualmain n'existan naginas disposiziuns legalas – ni da la Confederaziun ni dal chantun – che reglan la protecziun da staziuns da fructificaziun tras scumonds da posiziunar avieuls entaifer in tschert radius enturn la staziun da fructificaziun. Prescripziuns datti mo concernent il cumbat cunter epidemias. Correspondentmain ston las tegnidas d'avieuls resp. las apiculturas ed ils apiculturs vegnir registrads tar l'Uffizi d'agricultura e da geoinformaziun (UAG). Ultra da quai vegnan registrads tut ils avieulers cun il dumber da pievels e cun il lieu exact. Mintga avieuler sto vegnir marcà cun ina plachetta che cuntegna in numer d'identificaziun attribuì da l'Uffizi per la segirezza da victualias e per la sanadad d'animals (USVA). Sumegliantmain sco tar l'alpegiada da muvel extrachantunal datti er «apiculturas ed apiculturs ambulants» che transfereschon lur pievels d'avieuls stagiunalmain en territoris alpins dal chantun. Er quests pievels ston vegnir registrads e marcads. Percunter vegn l'allevament d'animals da princip reglà da las differentas branschas. Las normas en il sector da l'agricultura sa restrenschan sin la promoziun da l'allevament d'animals sur organisaziuns d'allevament renconuschidas. Ultra da quai vegn sustegnida la perscrutaziun e la cussegliaziun.

Il paregliament da reginas d'avieuls cun avieuls mastgels ha lieu en moda natirala ed en libertad. Senza regulaziuns en furma da limitaziuns territorialas è il paregliament tranter reginas ed avieuls mastgels casual e selvadi. Cun staziuns da fructificaziun èsi pussaivel da controllar sistematicain il paregliament e d'evitar cruschadas nun-giavischadas. En il chantun Grischun èn derasadas principalmain las trais suandantas razzas da l'avieul da mel occidental (apis mellifera): l'avieul nair (a. m. mellifera), l'avieul Carnica (a. m. carnica) e l'avieul Buckfast (a. m. ligustica). Las duas finamiras principalas da l'allevament d'avieuls entaifer ina razza èn la sanadad dals avieuls (toleranza envers la varroa, restistenza al fraid, prestaziun e.u.v.) e la quietezza. En il chantun datti actualmain tschintg staziuns da fructificaziun per alleva reginas d'avieuls: Greina e S-charl, avieul Carnica, 800 resp. 600 reginas; Valzeina e Val Müstair, avieul nair, mintgamai 100; Grialetsch, avieul Buckfast, 470. Per il manaschi procuran per regla uniuns d'apicultura localas u gruppas d'allevament regionalas dal

chantun Grischun (Valzeina: grupp d'allevament dal chantun Son Gagl). La bransch regla il manaschi resp. la protecziun da las staziuns da fructificaziun cun urdens d'utilisaziun tenor las prescripziuns da l'uniun d'allevament respectiva. Per regola èn er definidas là las distanzas minimalas ch'èn recumandadas envers staziuns da fructificaziun. Er l'Uniun svizra d'apiculturs ambulants publitgescha recumandaziuns correspundentas. Mo ils chantuns Berna e Glaruna enconuschan disposiziuns legalas che pussibiliteschan da fixar zonas da protecziun, che pussibiliteschan a las autaritads da fixar liantamain zonas da protecziun e da pronunziar scumonds. En il chantun Glaruna èsi plinavant mo permess da tegnair e d'allevar l'avieul nair. La pli gronda part da las apiculturas e dals apiculturs profiteschan da las staziuns da fructificaziun e respectan er las zonas da protecziun definidas da la bransch. Las regulaziuns da bransch funcziunan. Eventuals surpassaments han per regola lieu per mancanza d'infurmaziuns e strusch intenziunadamain. In scumond per lescha n'avess pia nagin effect supplementar. Pervia da lur situaziun periferica èn las staziuns da fructificaziun ultra da quai pertutgadas mo fitg darar da mesiras da bloccada tenor il dretg d'epidemias. Perquai na datti tenor il dretg d'epidemias d'animals nagin motiv da proteger supplementarmain las staziuns da fructificaziun. Correspundentamain è la Regenza da l'avis, ch'ina nova regulaziun legala na fiss betg cunvegna.

Il UAF metta a disposiziun al USVA tut las datas da gestiun da las apiculturas e dals apiculturs. Il USVA registrescha lura en il SIG tut ils avieulers identifitgads, cun las coordinatas sco instrument per cumbatter epidemias. Sin dumonda da l'Uniun grischuna d'apiculturas ed apiculturs ha il USVA surdà la primavaira 2024 l'incumbensa da far in studi preliminar davart la recumandaziun da la bransch d'integrar en il SIG in perimeter da protecziun enturn las staziuns da fructificaziun. Il studi ha mussà, che quai è tecnicamain pussaivel e che las datas pon schizunt vegnir integradas en la preschentaziun dals territoris da bloccada (disponids tenor il dretg d'epidemias). Avant che spustar pievels d'avieuls pudess uschia mintgina e mintgin s'infurmar da tut temp davart ils territoris da bloccada (pesta ascha, pesta americana) e davart ils perimeters da protecziun, che la bransch d'apiculturs recumonda enturn staziuns da fructificaziun. Fin la primavaira 2025 è il USVA pront d'extender las datas en il SIG.

Sin basa da questas explicaziuns propona la Regenza al Cussegl grond da refusar l'incumbensa qua avant maun concernent la protecziun legalmain lianta da las staziuns da fructificaziun per avieuls e da l'acceptar concernent l'integraziun da las zonas da protecziun en il SIG.



En num da la regenza

Il president:

Il cancellier:

Dr. Jon Domenic P

e.sub. C. Hartmann Lütcher